



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir\_yimym



tir yimym

TAPAK 7

**Bajrang Punia nem kum pezü atema tenokdangba agütsü**

**Pakistan police-i Khan pusema longkak aiterem mintok**

VOL. XXII ISSUE NO. 49 (ADOK 49) DIMAPUR YANGTEPNÜ (THURSDAY) YIMPOKSÜI (NOVEMBER) 28, 20 ₹ 5.00

## CM Neiphiu Rio-i maparen aika tenzüksüogo

**Dimapur, November 27, 2024 (TYO):** November 27, 2024 nü Chief Minister Neiphiu Rio-i IDAN, Capital Convention Centre nung mapatong aika tenzüksüogo. CM Rio-i Ura Cabs tenzüksüodang "iba ya Nagaland nüma atangba mapangka lir" ta ashi. Ura Cabs ajanga tourism aser transportation tsüngda tetsükdaksü alibatem agientsü aser iba sabang ajanga local taxi kiburtemi sen aazüksü lenmang lapoktsür ta CM Rio-i ashi.

Nagaland Tourism Connect maparen nung shilem ka ama Chief Minister-isa 20-seater Tata bus, Tata Winger, Kia Caren, aser Toyota Innova garitem sayatsüogo.

Item garitem ajanga Nagaland maitsü ajungketsü aser nisungtem anisüngzüka senzusenbongtsü.

Chief Minister Rio-isa Nagaland Logistics Connect ta ser sentong ka tenzüksü aser iba ya local mechanics-i advanced BS-6 vehicle technology shiameteta alitsü atema lir.

Nagaland Logistics Connect-i mapa tasen tenzüksüba ya commercial atema aliba garitem nung exclusive discounts aser subsidies agütsür. Entrepreneur temi gari alidang 12% manufacturer discount aser Chief Minister's Micro Finance

Initiative (CMMFI) ajanga 42% subsidy tashi angütsü.

Nagaland nungsa Digital Piggery Insurance ta ser tenzüksüogo aser iba ya Insurance Regulatory and Development Authority of India (IRDAI) aser Tata AIG den yaritepa inyaktüsü.

"Iba app-based system ajanga ak metsürtem registration zübazüba sütettsü. Iba mapa ajanga financial security agütsüba dang masü saka meta talang pilar aliba aluyimertem nem tashi agütsür. Ano iba ajanga Nagaland State Rural Livelihood Mission aser Animal Husbandry and Veterinary Department sendakteper" ta CM Rio-i ashi.

Paisa Chief Minister's Universal Life Insurance Scheme indang metetdaksüodang "kibongtem nung meimlai aliba lendongsüodang atalokdang sorkari social & financial security agütsütsü atema iba ya tenzüker" ta ashi.

"Nagaland nung 25 buba Hornbill Festival amongtsü renemndang sendaktepa alir ajaki iba benjung ya Naga nunger yimya tajung aser ajak ayimjema inyakba kuli sūdaksütsü ayongzüker. Asenok ajak longjemer tourism ecosystem takang ka yanglutsü merangdi" ta CM Rio-i ashi.

## Nagaland nung Haemodialysis Machines talila 11 amenoktsü

**Guwahati, November 25, 2024 (Agencies):** Northeast India nung healthcare ajungketsü atema Indian Oil Corporation Limited (Indian Oil)-i Fairfax India Charitable Foundation aser Nagaland sorkar den tesentakteper yangluogo.

Pradhan Mantri National Dialysis Program (PMNDP) kübok Haemodialysis machines 11 agütsütsü atema November 25, 2024 nü Guwahati nung tripartite agreement ka nung sign sütepogo.

India nung Chronic Kidney Disease (CKD) ya public health tebilemstü tulu ka lir aser nisung million 1.3 shi kati hopta nung anaben-aseben tashi haemodialysis nungdaker. Linük nung haemodialysis machines nungdakba ama peria mangur nisung 200,000 atema machines 35,000 dang lir.

Yimtsüngtem nung alirtem asoshi haemodialysis atema kümshia Rs 2.4 lakh endokba den senzütsü aser anenzüksü asoshi sen endoker.

Nagaland kübok district aika nung haemodialysis facilities mali aser tang lapoka alidak nisung ajak anepalutsü makoker.

"Iba mapa atema tesentakteper yangluba ajanga Fairfax aser Indian Oil-i healthcare infrastructure ajungketba dang masü saka sensotem temang anema alitsüba nung yariteper" ta National Health Mission,

Directorate of Health & Family Welfare Mission Director, Dr. Akuo Sorhie-i ashi.

"Iba tesentakteper ajanga healthcare tebilemstütem asoshi public-private yaritepba tashi indang kuli agütsür" ta Indian Oil nung Chief General Manager (HRD & ER), Udit Jain-i ashi.

"Onok nükjiongji Northeast nung healthcare ongdang aliba agientsü atema lir. Indian Oil-i meta talang pilar alidaka kasa healthcare services agütsütsü bendanga agütsüba iba mapa ajanga sayur" ta Indian Oil - Assam Oil Division Executive Director & State Head, Rajesh Nambiar-ia ashi

Tesüba nunga Fairfax India Charitable Foundation-i India nung haemodialysis machines 21 tashi amenokogo aser tang Indian Oil-i haemodialysis machines 11 agütsüba ajanga nübertemi dialysis services sadema angütsü.

"Indian Oil-i onok den yaritepa haemodialysis machines 11 agütsüba atema kanga pelar. Iba ajanga Nagaland nung dialysis infrastructure kanga nungdaka aliba nung teyari tulu angütsü" ta Fairfax India Charitable Foundation Trustee, Vishal Suri-ia ashi.

Department of Health & Family Welfare-i tang Kohima (NHAK), Dimapur, Mokokchung aser Tuensang District Hospital tem nung dang Dialysis services agütsür.

## Aotsür aser Padma Bushan Dr. S.C Jamir tilutsüba anema mepelaba sayu



Watsü Mungdang züngsemtemi yimdong süa jajaba mapang agiba noksa angur.

**Sashimeren Jamir Mokokchung, 27 Nov :** Facebook sabang tenüng agi, "Patriotic Nagas" ta sür ka nung kari Aotsür rangben tiluja aser Padma Bhushan Dr. S. C Jamir anema mezümgmeshia züluba dak sentakba nung tejashiba sayua 27th November, 2024 nü Watsü Mungdang-i ola madok yimdong süa jajaba sentong ka ayongzüka liogo.

Tanep Aor Kilem nung adenshia yangji sentong ka agir külen iba nungjagi Mokokchung Deputy Commissioner office tashi yimdong süa or Nagaland Governor dangi takangba zülü (memorandum) ka Mokokchung DC, Thsuvisie Phoji nem amoktsü. Watsü Mungdang lennirtemi iba zülü Mokokchung DC, nem agütsüodang, pai (T.

Phoji-i) iba zülüji tanüsa Nagaland Raj Bhavan tongtsütsü ta metetdaksü.

WM-i züluba nung shia aliba agi, Facebook telok "Patriotic Nagas" nung Aotsür rangben tiluja aser Padma Bhushan Dr. S.C Jamir tenüng menüksüba dak sentakba anema Ao Senden-i 13th November, 2024 nü Nagaland DGP, Rupin Sharma IPS ajurua teinyaktüsü tim inyakogo, aser Dimapur Ao Youth Organization (DAYO)-ia iba mapa anema Cyber Crime Police Station, PHQ, Kohima nung FIR agütsüogo, saka tanü tashi terenlokba kecha mangur. Anungji, iba dak sentakba kenoji repringdaksünür aser aibelenerji aputsüla, ta WM Tir, S. Arenla Longkumer aser Tezülur, Sungtireben nadi governor dangi

mepishia zülüogo.

Banner nung "Patriotic Nagas (Facebook)-i Aotsür aser Padma Bhushan Dr. S.C Jamir tilutsüba anema onoki yakta action agitsü akanger" ta zülua bener nisung shia teka nung sü tanak agi mesür (sü tanak mesüba tetezü mepelar aser mulungku sayuba tamaitüsü lir) Aor Kilem nungi Mokokchung DC office tashi ola madoki jajayonga or takangba zülüji Mokokchung DC nem agütsü. Kasa zülüji Nagaland CM, Dy. CM, Ao legislators, Chief Secretary, Nagaland DGP, Mokokchung DC & SP, Ao Senden, Central Naga Women Association aser Dimapur Ao Youth Organization (DAYO) dangia yokogo, ta WM ketdangpurisa metetdaksü.

(Maneni tapak 2 nung...)

## Longkhum yimtak Cherry Blossom Festival kadagi

**Longkhum, November / Yimpoktsü (TYO):** Longkhum yimtak Yimpir Kujajen tesem nung Cherry Blossom Festival kadagi.

Iba sentong nung alakteta jaoker Ao Senden Tir Wb. Marsanen Imsong-i jembidang Longkhum yimtak Cherry Blossom Festival akaba ya benjong ka akaba dang masü saka iba Cherry Blossom Festival ya ajanga limapenzür puatsü aser asen lima limapenzür aikati semdangtsü lenmang lapoktsü ta ashi.

Tanu putu nung tsüngkang medema lanurtemi mapa tajung ka apiteta Cherry Blossom Festival tenzüksüba ya nukmen tasen ka tenzüker ta Marsanen-isa shisem.

Ao Senden Tir-isa Longkhum-ji alushi tulu, sobaliba takang aser kechisarena nung tangar makaba temoatsü aika akaba yim ka lir,iba den külemi Longkhum limaji lenir sotetba

yimkong,sobaliba metetba yimkong,tamangdir aser yimsüsür aika sotetba yimkong lir.Laishir Rev.Lanu Longchar aser Lenir Imkongmeren nungeri inyaker metembang toktsüba maparentem Longkhum lanu asensortemi inyaktüsü asoshi mangdang akatsüla ta Longkhum lanurtem ayongzüka jembi.

Kasa sentong nungsa tetushi tejaoker Mokokchung Deputy Commissioner Thsuvisie Phoji-i jembidang Longkhum lima nung Cherry Blossom Festival ya sentong tilaka ama tezüker saka iba tarutsü nungbo benjong tuluka küma nüburi meteta akümtsü aser lima penzür aika asen lima bushia arutsü lenmang sadema lapoktsü nukla angurta teimla akaba olen ka metetdakja ashi.

Mokokchung Deputy Commissioner-isa Naga lima tourism tsütsülen kangabo terenlok makabaji lima penzür puatsüsa ki o jen aser parnok lima penzürtemi aginütsü kecha

renema maka, lima penzür puatsü ajak agi horbill festival kija dang lir, tanu Longkhum yimtak Cherry Blossom Festival dak ajemdaker Longkhum lima nung lima penzartem puatsüsa akaba rongsentemji kanga junga amshitetsü kanga dang tenüngdaksü ta ashi.

Sentong nungsa Longkhum Village Council Chairman Wb.C.Angang Jamir aser Cherry Blossom Festival Organising Committee Convenor Imtisüngkum tenatia salem o aser tarur pela agizükba jembiba den Longkhum Baptist Arogo Pastor Rev.T.Aka ajanga Tsüngrem dang nungi lenisüba jazüka sarasademer sentong tenzüksüba den Apoksangba lenisüba nung iba sentong agi.

Cherry Blossom Festival ya November 29 nü tashi agitsü aser iba sentong nung osettsüset,chiyungtsü,aonsotsü aser kenten menü sentongtem balala agitsü renema lir.



# Indian Red Cross Society Nagaland State Branch inti senden menogo



Indian Red Cross Society Nagaland State Branch inti senden nung tangokba noksa angur.

**Dimapur, Yimpoksüi/ November 27 (TYO):** 37buba Indian Red Cross Society Nagaland State Branch Annual General Meeting, ceremonial function Dr. Imkongliba Ao Hall, Raj Bhavan nung November 27 nü agiogo.

Tir o jembiba mapang Angh-i ashiba agi, iba senden ya senden ka dang masü saka züngsemtem, volunteer tem aser iba lokti tentet nongita yarir temi lokti nung temelenshi bener arutsütsü atema tanen makai inyakba benjungba anogo ka lir.

Tetsükdaktsütem aika ajangshiaka Indian Red Cross Society, Nagaland State Branch-i item ajak ajangteta alizüing tongtetogo aser timtem lendong balala atalokba mapang teyari balala agütsütetogo, ta

Angh-i ashi. Angh-isa, General Secretary, Akhale V. Khamo nem tenüngsang agütsü, shibai bendanga agüja inyakba ajanga iba mission tejakdangi benerogo ta ashi. Lai bendanga agüja inyakba ajanga Shamator, Niuland, aser Chümoukedima nung branch tasen aser Jalukie aser Peren nung sub-branch amenokogo. Manipur nung relief operations mapang la lenisüba ya ajak atema tatishitsü tajung ka kümogo, ta pai ashi.

Maneni Angh-i, Red Cross pur asoshi nükjidong tongtibangtiba rongnung kaji Kohima nung temesepba mozü achirtem aser yi ajemertem atema Rehabilitation Centre ka amenoktsütsü atema benoker aliba ya lir, ta ashi.

Angh-i, züngsem, volunteer, aser patrons tem dang maneni asendenshir meranga inyaktsü aser Indian Red Cross Society, Nagaland State Branch ya nungdakba purtem atema timla agütsüba lokti ka ama maneni inyaksangshiyonga aotsü ayongzüka liasü.

Paisa, district branches, staff, aser volunteer ajak dang parnok mapa tajung asoshi kanga pelaba lemsatapa liasü.

Sentong nung Angh-i, Patrons aser Vice Patron tem nem tetushi agütsü aser Voluntary Blood Donors Association, Helena Yephthomi aser Peren district nem award agüja liasü.

Kasa anogo Angh-isa, Rishav Sethi-i yangluba Blood app ka sayaja liasü.

# Sorkar scheme agitsü atema Aadhaar nungdaker: DoSE

**Dimapur, Yimpoksüi/ November 27 (TYO):** Directorate of School Education-i sangdong ka ajanga sorkar aser private school ketdangsur ajak dang, stipends, scholarships, APAAR ID, Student PEN in UDISE+ amala sorkar scheme balala agitsü atema Aadhaar ya mandatory kümogo, ta metetdaksü.

Iba dak sendakba nung school ketdangsurtemi Aadhaar card maliba kaketshirtem jangja-a, sorkari agütsüba scheme tem magishitsü aliba nungi jenbotsü atema parnok züngoksemdaktsütsü asoshi

tongtibangsa jenjang agitsü metetdaksüogo.

Kaketshirtem ajak ket nung Aadhaar card aliba ajanga item scheme tem kecha tetsükdaktsü makai benoka inyakttetsü, aser kaketshirtem parnok education atema tenüngdakba senotsü aser tanga resource tem agitsü atema teyari agütsütettsü.

Temetetsü kaji UIDAI, Government of India-i, block level nung school tanurtem Aadhaar enrollment agitsü atema Department of School Education nem tashi agütsüogo aser iba ajanga facility ya lokti- i mela mela agitettsü. State

nung Educational Block Research Centres (EBRCs) tem timba nung school tanurtem ajangzükdaktsütsü atema Aadhaar enrollment kit lir.

Maneni school tem dang EBRCs nung facility aliba takok tashi amshitsü aser school tem nung enrollment camp tem ayongzüka agitsü metetdaksüogo. Iba inyakim ajanga temsüa aliba kaketshirtem ajak züngoksemsü atema teyari agütsütsü aser tsürapur aser guardian tema mapa tayongba kumdaktsütsü.

# Aotsür aser Padma Bushan ...

(TAPAK 1 NUNGI...)

Aotsür aser Padma Bhushan Dr. S.C Jamir tilutsüba anema Headquarter - Mokochung nung dang masü Nagaland aser India lima tesem balala den bendang lima tashi nung lungkak aitba sentong ayonga agiba WM ketdangpurtemisa metetdaksü.

“Aotsürji masüngtet ta luja aser asen lenir Dr. S.C Jamir anema züluba dak sentakba nung Ao Senden-i anir telok balalai ola adokogo, saka tanü tashi kecha telangzüba maka. Iba ama Aotsür/ Aor sensaja aser mezüngmeshiba yabo odang ajemajema kazütsüla masü ta tejashiba sayua tanü iba sentong ayongogo”, ta WM tiri metetdaksü.

“Tanü Nagaland Governor dangi takangba ka agütsür, iba sülen telangzüba kecha melira mapang nung tanabuba meraji agitsü”, ta laisa renema alitsü asoshi olen ka metetdaksü.

Iba sentong nung Ao Senden

tir, Marsanen Imsong-i jembidang, tanü koba Facebook telok “Patriotic Nagas” ta sür kadi Aotsür rangben sensaja Ao kin dang tetuyuba agüja aser asen lenir Dr. S.C Jamir mezüngmeshibaji Ao kini maremer, ta metetdaksü.

Nov 4, 2024 nü iba osang ya media balala ajanga angus aser Ao Senden-i iba FB group Admin dang iba ya shibai zülu anogo tenet (7) tsüngta tenüng agüjang ta sangdong, saka iba FB telokjiang shibang aser nisungbo magütsü. Anungji, tanabuba meraji Nagaland DGP, Rupin Sharma IPS ajurua tim nungdakba inyakogo. Iba maparen dak sentakba nung WM, AKM, CNTC, CNWA, DAYO aser lokti balala shirnokisa ola adokogo, parnok ajak dang AS tirisa pelaba lemsatap.

Tenüngbo “Patriotic Nagas” saka kin ka rangben ajemshiba

dang “Patriotic Nagas” ta majar, item dangji “Anti-Nagas (Naga nungner anemer)” ta ajar, ta paisa ashi. Naga nüchiso bushiba nung Ao kin nungi mezüngbuba tir, T. Aliba lmti lenir sür tenzü, tanüa Aor aika lir aser inyaka aruogo. Anungji, “Patriotic Nagas ji nüchiso bushir telok asü, kechi telok memetet, saka kodang putetdir, Aor sobaliba dak ajemdaker tim mera agitsü”, Ao Senden-i lemteta lir, ta AS tirisa shisem.

“Tiyazü kuli amer shibai/ shirnoki o agi süshia mesüra mapa agi süshia Ao kin mezüngmeshidir, Ao kini tatok magütsütsü”, ta Ao Senden tirisa ayimoktsü. Tanü koba WM-i governor dangi takangba züluogo, iba ya Aotsür/Aor ajaki züluba lir, ta paisa ashi. Ibai tekaratiba nung tatembang kadi arua asen temeten wazüka ayutsü imlar, ta paisa shisem.

# Kohima DC-i invitation aser giri pass indang metetdaksü

**Dimapur, Yimpoksüi/ November 27 (TYO):** Deputy Commissioner Kohima Kumar Ramnikant IAS-i sangdong ka ajanga, HOD tem ajak dang, 62buba Statehood Day benjungmung atema Invitation Card aser Car Pass Kohima

Deputy Commissioner office Establishment Branch nungi agizütsü metetdaksüogo.

Invitation Card aser Car Pass ya November 28 nü nungi tenzüka office mapang agütsütsü, ta kasa sangdong ajanga metetdaksüogo

# NSCN/GPRN motorbike ana nguteta lir

**Dimapur, Yimpoksüi/ November 27 (TYO) :** NSCN/GPRN-i registration number maliba Yamaha FZ motorbike ana nguteta lir.

lir aser iba bike indang engine number 21CD013726 aser chassis number ME121C0D9C20130808 lir, ta metetdaksüogo.

Bike ana rongnung ka anüing sentsü lir aser iba bike indang engine number 21C6033971 aser chassis number ME121C061B2033757 lir aser tanabuba bike ya sentsü tanak

Temalen shisema aliba motorbike kiburtem dang anogo tenet tsüngda iba phone number; 9863823864 ajanga t o n g t e p r a t e p t s ü metetdaksüogo.

# Excise Staff Quarter tasen ka semzükogo



**Dimapur, Yimpoksüi/ November 27 (TYO):** November 27 nü Advisor, Excise, Labour & Employment, Skill Development & Entrepreneurship, Government of Nagaland, Moatoshi Longkumer-i Excise Training Complex, Lengrijan, Dimapur nung Excise Staff Quarter Building (Block-VI) ka semzüktsüogo.

Contractor temi achaayanga project mapang shitak nung tembangba atema parnok nem tenüngsang agütsü.

Ki tasen semzükba sentong ya Commissioner of Excise, Atokhe Aye (NCS) lenisüba nung agia liasü.

Advisor-isa, NLTP Act aser NDPS Act benoka inyaktsü atema Excise kübok inyakertemi bendanga agüja nendak nendaka aser mapa jeta inyaktsü koda tongtibang iba indang lemsatapa liasü.

Sentong nung o jembiba mapang Advisor-i, Technical Department (Housing) aser

Sentong nung Abhija Khing, EE (Division-I), Housing-i technical report agütsü aser tepela o Deputy Commissioner of Excise (Enforcement) Vithoselie Terhuja-i jembiba liasü.

# Kohima DPDB senden nung terenlok maparentem lepa reprangshi

**Dimapur, Yimpoksüi/ November 27 (TYO):** Ita shia amenba Kohima District Planning & Development Board (DPDB) senden November 27 nü DPDB Hall nung menogo. Iba senden ya Deputy Commissioner Kohima, Kumar Ramnikant, IAS lenisüba nung agi aser MLA aser DPDB Kohima mendenbuba Dr. Tseilhoutuo Rhutso-ia shilem agia liasü.

Government Polytechnic College Kohima Principal pelashishia agizüka liasü.

Senden ya taoba mapang lemtetbatem lepareprangshia tenzü, kasa mapang nung BDO Chiephobozou, Seyiekhrielie Rio-i, Rural Development Department indang inyakimtem metetdaksü. Pai MGNREGA, Aadhaar-based payment systems, aser Direct Benefit Transfers amala department kübok scheme tem indang metetdaksü. Rio-isa, Chiechama, Nerhe Model Village aser tanga tesemtem nung terenlok maparentem aser NSRLM aser Start-Up Village Entrepreneurship Programme kübok Self-Help Group tem inyakim indang metetdaksü.

Kasa mapang nung Dr. Tseilhoutuo Rhutso-i, benjung mapang asünung taxi tem mereka amshitsü aser driver indang osang tejangja menden tesülen toktsütsü benokdanga liasü. DC-i, SHe-Box portal requirements dak sendakba nung Internal Complaints Committees amenokba indang ketdangsurtem nem metetdaksü. Maneni Water Resource Department dang January 2025 DPDB senden nung Power Point presentation agütsütsü tetuyuba agütsü.

Board-isa, Kidima, Nerhema, Kohima Village, aser Chunlikha indang sarpanch tem District Water & Sanitation Mission (DWSM) Committee nung küm ka atema melentapa inyakdaksütsü telemtetba agi. Board-isa, züngsem tasen,

Kasa mapang nung Dr. Tseilhoutuo Rhutso-i, benjung mapang asünung taxi tem mereka amshitsü aser driver indang osang tejangja menden tesülen toktsütsü benokdanga liasü. DC-i, SHe-Box portal requirements dak sendakba nung Internal Complaints Committees amenokba indang ketdangsurtem nem metetdaksü. Maneni Water Resource Department dang January 2025 DPDB senden nung Power Point presentation agütsütsü tetuyuba agütsü.





Bangladesh nung Hindu nung lenir, Chinmoy Krishna Das Brahmachari apuba anema November 27, 2024 nü Kolkata nung BJP lenir Suvendu Adhikari den tanga party balala nungi lenirtemi Kolkata nung aliba Bangladesh Deputy High Commission kima longkak aitba noksa nung angur.

### Eknath Shinde-i Deputy CM menden magizüksü: Shiv Sena

Mumbai, Yimpoksüi/ November 27 (Agencies): Tawa Maharashtra assembly election nung BJP-i aniba Mahayuti teloktepi takok anguba sülen Chief Minister shimtsü atema jembiba mapang nung Bodhbarnü Shiv Sena (Shinde) teloki, Eknath Shinde-i Deputy Chief Minister menden magizüksü, ta metetdaksü. Bodhbarnü Shiv Sena lenir Sanjay Shirsat-i, "Eknath Shinde-i Deputy Chief Minister menden magizüksü," ta metetdaksü. Maharashtra assembly election nung takok anguba atema ruling BJP-i aniba Mahayuti teloktepi kanga benjungtepogo, ajisüaka iba teloktepi nung densema aliba party ajaki Chief Minister menden aginüba ajanga tang koda masüba tensa ka ajangshia lir. Osang angazükba agi, asüng tashi nung teletmetba agia Chief Minister shimtsü. Osangbener den jembidang

Shiv Sena lenir Sanjay Shirsat-i, "Eknath Shinde-i Maharashtra Deputy Chief Minister mapa magizüksü. Eknath Shinde tenüng nung Assembly elections nung toktepa liasü. Pa maneni Chief Minister shimtsü temsüa lir," ta ashi. Shirsat-isa, "Onoki CM ji Shiv Sena nungi südaksüner. Onoki CM Eknath Shinde lenisüba nung election nung toktepi aser bangdak lenirtemia pa moatsütsü ta onoki amanger. December 2 tashi nungbo Maharashtra nung sorkar tasen tentetsü. Tenangzükba agiba sentong tulu ayongzuka agitsü, anungji iba sentongji Wankhede Stadium nung agitsüa akok, ta ni bilemer," ta metetdaksü. CM dak sendakba nung BJP-i meyipshishiba atema NCP-SP lenir Clyde Crasto-i BJP aija, "Elections agiba mapang nung BJP-i, parnoki Mahayuti nungi lenirji Eknath Shinde ta jembia aruogo. Pai meranga inyaka takok anguba

sülen tangbo parnoki tanga atema jembir, anungji iba tetezü parnoki Shinde amshir," ta ashi. Maharashtra election nung BJP-i menden 132 nung takok angu, anungji iba menden atema BJP nungi Devendra Fadnavis shimtsüa akok. Ajisüaka Eknath Shinde-i aniba Shiv Sena telokia menden 57 nung takok ngua CM menden akhanger. Union Minister Ramdas Athawale-ia, Maharashtra sorkarji Devendra Fadnavis-i anitsüla, kechiyong Maharashtra nung nüburtemi Fadnavis CM südaksüner, ta ashi. Athawale-isa, Eknath Shinde-i Deputy CM menden agitsü akok mesüra Modi sorkar nung shilem agitsü akok, ta ashi. CM menden atema Devendra Fadnavis aser Eknath Shinde na dak alia Nationalist Congress Party (NCP) nungi Ajit Pawar-ia CM menden aginer. Ajit Pawar-ia aniba NCP-i menden 41 nung takok ngua liasü.

### Agra expressway nung gari lendong ka nung doctor 5 tsükset

New Delhi, November 27 (Agencies): Bodhbarnep züngia Uttar Pradesh nung Kannauj district kübok Lucknow-Agra Expressway nung gari tsükokba lendong nung doctor pongu tsükset aser doctor ka mejungi yiruogo. Police-i ashiba agi, anepdang züngia 3:00 ako meta Lucknow nungi Agra-i toudak mapang Scorpio SUV gari ka mazüokteti 'divider' nung tsükoktsüba sülen lenmang

tipleni aodang truck kati tsükoktsü. Superintendent of Police, Amit Kumar Anand-i, iba tesem nungjisa doctor ponguprongla asü aser Saifai Medical College nung postgraduate student arrshi küm 39, Jaiveer Singh kanga mejungi yirua Tirwa nung aliba Dr Bhimrao Ambedkar Medical College-i anir oa treatment agidar, ta metetdaksü.

Iba lendong nung asür doctor ponguji Agra nungi Dr Anirudh Verma, Bhadohi nungi Dr Santosh Kumar Mauryai, Kannauj nungi Dr Arun Kumar Bareilly nungi Dr Nardev (35) aser Rakesh Kumar (38) nung liasü. Saifai nung Uttar Pradesh University of Medical Sciences nungi doctor temji Lucknow nung kiyimba sentong ka nung adenba sülen meyipa aodang iba lendong atalok.



November 27, 2024 nü Visakhapatnam nung aliba Tagore Pharma Laboratories nung miim mozü tamajung ajanga nisung ka asüba aser aika temang nung timtem adoka hospital-i anir aoba sülen police-i iba tesem nung bushisüngdangba noksa nung angur.

### Adani jail nung alitsüla saka sorkari pa kümzüker: Rahul Gandhi

New Delhi, November 27 (Agencies): US nung ketdangsertemi Gautam Adani-i sübokrem agütsü, ta tai tonglokja liaka Centre sorkari pa anema kecha meinyakba atema Lok Sabha nung opposition lenir Rahul Gandhi-i sorkar sashia aitsüogo. Adani Group chairman, Gautam Adani den par adianu chir Sagar Adani aser executive, Vneet Jaain nungeri solar light contract angutsü atema India nung ketdangsertem nem dollar sen million 265 sübokrem agütsüogo, ta US Department of Justice (DOJ)-i tai tonglokja lir. Iba contract ji ajanga küm 20 tsüngda dollar sen billion 2 tajangzük angutsü. Ajisüaka Adani Group-ibo US ketdangsertemi Gautam Adani, Sagar aser Vneet Jaain nung nem tai tonglokja alibaji tiyazü ta shiogo. Bodhbarnü Parliament kima jembidang Congress lenir Rahul Gandhi-i, "Adani ya jail nung alitsüla. Adani-i pai aibelenogo

ta nangzüksü, ta nai amanger asü? Atangji pai aibeleno mali ta pai ashitsü. Onoki jembiba ama pa aputsüla. Tilateri nung tai tongloktsüba kija nunga nisung noklang aika apur saka iba nisungba yabo sen crore aika atema United States nung tai tonglokja lir. Pa ya jail nung alitsüla saka sorkari pa kümzüker," ta ashi. Asüka mongpu Parliament tasemnübuba nunga opposition-i Adani nem tai tonglokja aliba onük nung o lemteptsü takhangba agütsüba ajanga senden nung rongrong adok. House anaprongla nung senden tenzükba sülen mapang tatsüka tsüngda Lok Sabha senden anüngdang 12:00 ako tashi thinena liasü aser Rajya Sabha senden-a anüngdang 11:30 ako tashi thinena liasü. Bodhbarnü Adani Group-i sangdong ka ajanga, Adani aser par adianu chir Sagar nati Foreign Corrupt Practices Act (FCPA) kübok ozüngtem alema inyakba atema tai tonglokja mali, ta metetdaksü.

### Andhra Pradesh nung Rajya Sabha menden asem atema by election agitsü

New Delhi, November 27 (Agencies): Election Commission of India (ECI)-i Andhra Pradesh nung Rajya Sabha menden tazüng asem atema by election agitsü osang sangdongogo; YSRCP nungi Rajya Sabha züngsem asem-Venkata Ramana, B Mastan Rao Yadav aser BC lenir R Krishnaiah nung anenba ajanga menden asemji azüngteta liasü. Yadav aser Krishnaiah na kümsük küm pezüzü anünga lia anenba aser Rao kümsük küm ana anünga lia anenba ajanga YSRCP jenjang raksaogo. Tang YS Jagan Mohan Reddy-i aniba party nung Rajya Sabha züngsem 8 dang lir. December 20 nü by election agitsü aser iba election nungji TDP-i aniba NDA teloktepi menden asemprongla nung takok angutsü nükjidong yur tokteptsü. Tang Andhra Pradesh state assembly nunga NDA nungi MLA 164 lir; TDP kija nungi MLA 135 lir aser Jana Sena

MLA 21 aser BJP MLA 8 lir. N Chandrababu Naidu-i aniba TDP-i Rajya Sabha nung jenjang amenoktsüa akok, kechiyong tang tashi nungbo Rajya Sabha nung parnokk züngsem ka danga mali. Ano YSRCP-ibo iba election nung metokteptsüa akok. December 20 nü by election agiba sülen kasa anogo nungjisa vote azüngtsü. Kasa anogo nungjisa Odisha nunga Rajya Sabha menden ka atema by election agitsü. Biju Janata Dal nungi Sujeet Kumar anendaktsüba sülen pai iba menden tokja liasü. Pa kümsük 2026 küm April 2 nü ang tembangtsü liasü. West Bengal nunga TMC nungi Jawhar Sircar-i Rajya Sabha menden azüngtetsüba ajanga by election agitsüa akümer, Haryana nunga BJP nungi Krishan Lal Panwar-i assembly election nung tokteptsü atema Rajya Sabha menden azüngtetsüba ajanga by election agitsü.

SAI RECRUITMENT CELL HEAD OFFICE, GATE-10 JAWAHARLAL NEHRU STADIUM COMPLEX LODHI ROAD, NEW DELHI-110003 E.No.-01-04001(02)/5/2023-HO-Personnel Division Date:- 18.11.2024 SPORTS AUTHORITY OF INDIA-I CONTRACT NUNG CHEF MAPA ATEMA APPLICATION MESHIR Ministry of Youth Affairs and Sports kübok autonomous organization, Sports Authority of India (SAI)-i contract basis nung teimba agia küm 4 atema Chef mapa ka asoshi temsüa aliba India nung sensotem dang online ajanga application meshir. Iba mapa aser osang tejanga ajak SAI website. http://sportsauthorityofindia.nic.in nung angutsü. Online ajanga application agütsü atema teküboklen schedule agütsür:- (i) Online registration lapokba anogo - 20.11.2024 (10:00 AM) (ii) Online ajanga application agütsü tatemangba anogo - 05.12.2024 (05:00PM) DEPUTY DIRECTOR RECRUITMENT CELL SAI HEAD OFFICE





## TIR YIMYIM YIMOBILEM (EDITORIAL)

DIMAPUR YANGTEPNÜ, NOVEMBER (YIMPOKSÜI) 28, 2024

### Tejembitsü maka aküm asü ?

**T**awa Nagaland Chief minister-i par government nung tokolaktembo ajak anir Delhi nung oagi Naga yimten tebilemsü tatembang küma latettsü asoshi Union kilo kilonser Amit Shah ajuruba osangbo parnokia metetdaksüogo, anungji asenokia meteta lir. Ajisüaka, parnok o Amit Shah na tsüngda kechi jembiar, ajibo, tanü tashi parnokia mashir aser asenokia masüngdang, anungji asenokibo memetet. Aji oda, asenoki bilemsü agi, Nagaland nung tokolak purtem ajak oagi Delhi nung kilo kilonser ajurua jembiba osang kecha memetetdaksüba tetezüji tebilemba tonga jembitetba takok osang kabo masütsü. Atangji, Nagaland government nung Political Affairs Committee-i Naga nung yimten teloktem o India government na tsüngda o tongdar, interlocutor, asütsü asoshi yimten nisung ka shimtsü atema India government dang asüngdangtsü lemteta lir asünungji, ashiko, iba ken o ji bener oagi Amit Shah den jembia asütsü akok aser Amit Shah-i magizük südi. Idakji Nagaland Chief minister-i aniba Political Affairs Committee purtem chitaka lir amai angur. Nagaland government-i kümtetba Political Affairs Committee nung ya Naga nung yimten lenirtembo ajak dena lir. Ajisüaka, Naga nung yimten lenirtembo ajak adenshir, Naga yimten ken o mapang papikati jembiar aruba ya tatembang küma latettsü atema len tajung ka teyutsü melen, ano tang menur o tongdar, interlocutor, -ang melentsü asüngdangtsü lemtetba ya tangatettsü tasak. India o Naga nung yimten na tsüngda Naga yimten ken o jembitsü aser latettsü atema o tongdarji tongtibang masü saka India o Naga nung yimten na ya dang tongtibang ta angatetlasang tang menur len talangba bushia moula. Atangji, Naga nung yimten lenirtembo India den tangatettep nung Naga yimten latettsü mulunga lira, Naga nung yimten nüchiso bushir teloktem o India government na tsüngda kecha balaka o tongdar ka menügdaker. Aji oda, tang menur ano o tongdar melentsü akangba dang nungibo Nagaland government-i shimba Political Affairs Committee jagi parnoksa o tongdar akümtsüla, kechiyong parnokji Naga yimten nüchiso bushirtema masü aser India government tenüng nung jembitsüba purtema masü, parnok mapaji telok ana tsüngdaji o tongdatsüba dang lir. Ibaji tangar nisung tasen ka shima inyakdaksüdi süra parnok inyaksüba mapabo malitsü. Naga nung yimten tebilemsü ken o jembiaren nungbo ken o jembitsü tashi tembanga jembiogo ta Naga yimten teloktemia ashir aser India government-ia ashir. Anungji, tang parnok tsüngda ken o ashishitepa jembitsüba mapang masü saka inyaka aotsü atema inyakyim latettsüba dang anünga lir. Atangji, iba ama ken o lemtepa aoba mapa nung tetsüngda nung shisalemsatepa yariteptsü asoshi nisung nungdaker, item teyaritepertemji Nagaland Political Affairs Committee-ji asütsüla. Iba nungji parnoksa tetsüngdai ia meinyakra, interlocutor kisung melena yutsüba agi ken o ano khen tesüshii aoba dak alaka telemtetba kati marutettsü. Aji oda, Nagaland Political Affairs Committee-ibo Naga yimten tebilemsü ya tatembang küma mejembidaksüner ka mesüra, nisung melentsüba indang masü saka Naga nung yimten o India na tsüngda kong koba ken o nung tsükdaka yur ken o metembangteter, iba timtemji akoktsü atema tebilemba tajung agi shisa tasen agüja yaritsüla. Atangji, tereprangtsü aser tangatsübo Nagaland government nung alirtemi Naga yimten ken o ya tekaratiba nung latetner amai repringer saka Delhi orr arurbo ola madokba yagi joko Naga yimten dak aketba ken o ajak jembiar, tejembitsü maka aküm asü (?) ta bilemer. Aji oda, tenüng agidang Naga yimten tebilemsü ken o jembitsü aser India kübok election agili ano kasa onük jembiar government kümlü ta sa ora, küm ishika tsüngdabo Nagaland nung yimsüsüsüba telok aser government mejangjai akümtsü. Atangji, tanga Nagaland nung telok aikati yimsü asür, ibaji anentsü atema yaktasa Naga yimten tebilemsü ya Naga nungertemü mulungba nung koka telemtetba kati arutsüla.

## OLEMSABANG

### NLTP ACT: KECHI NUNG TAMAKOK?

~ Rev. Dr. N. Lipok Jamir, Pastor,  
Ao Baptist Church, Diphupar

(Yashi adok nungi...)

Kodang taküm bendanga agüja lumirtem 125ji temang ajema akümtsü tenzük arsangtep tensa tenzük. Saka parnok rongnung tzü ajemtsüa memulungi aküm. Yongji karbo temang touzük seret 10 tashi ajema alu; karbo anogo asembuba nung kanga luladok. Aji oda aodang parnokia memulungaka nisung 10 tashi hospital-i bener ao. Atangji June 23 anepdang 6 ako nungi June 26 3 ako tashi nung ghonda 81 tashi lumir S.C. Jamir, Chief Minister ajanga Government-i Total Prohibition Act yanglutsü tenangzükba sangdong. Aji ajaki kanga dang yongya ataba Ozüng November 9, 1989 nung benok. Saka iba Bill nungji section 7 nung yi yanglutsü, belenshitsü aser ayoktsü temelaba liasü. Anungji, ibaji anema NBCC noktak aser tatemsa March 29, 1990 nung The Nagaland Liquor Total Prohibition Act Assembly nung agizüka June 3, 1990 anogo arogotem ajak nung Tsüngrem nem Tenüngsang agütsüba Sentong agi. **Aji NLTP Act** benokba otsü.

**NLTP Act** ya süng lung, injang bomb amshia raratepa ajangzükba takok masü saka taküm agi tenlaa, sarasadem aser nüktzü jenti lalua Tsüngrem tsüngdang azüngashia nangzükba aser alangzükba ozüng ka lir. Saka tanü iba NLTP Act agientsüla mesüra meyipa repringshitsüla ta Govt.-i anir kuli balala aika agüja kija aser lokti balalai ola tulu adokba mapang lir. **NLTP Act** agientsüla ta jembiar tongtibang kulitem kar:

Mezüngbuba nung, "*NLTP Act sülen mozü achir jenti adoker*" NLTP mebenokdang Mokokchung town kinük ajak nung yi ayokdak dokan liasü. Yimdong nung tila tanurtem taintemi yi talii yokba yi pongdang amer ajuruba mapang liasü. Yongji tanurtem asoshi yiji mim aketba chiyungtsü, taküm aser tanela tepsetba chiyungtsü ama mebilemi bentshia ain. Tetezü NLTP Act malidang tila tanurtem yi talubo manung ain. Saka NLTP Act sülenbo 100 nung 30 shilembosa yi memeteti ainer. Ano kibong nung, yimdong nung, lokti nung yi ajanga rarabangsen jenti liasü, saka tanübo itemji ajema kümogo (*mali ta mashir*). Mokokchung town nung yi agi meseper ngasangatema senzüba aiben ajuruogo, saka tanübo itemto kanga ajema kümogo.

NLTPA mebenokdanga ganja achir, Heroin amshir aser achir talubo liasü. 80s tatemlen tashi ganja puff ka nung sen 2 agidang angu. Tongtibangsa early 80s nung Mokokchung yimtiba phensedyl addiction agi anünglak atong. Iba mapang Phensedyl pongdang ka nung sen 8 dang liasü. Mokokchung town nung Yamaha bike 100cc tulubo amshitep, itemji nükla nung lir. Itemji noklang nung 90 shilem mim mozü achirtem liasü. Tanü chirnurtem aikati memetettsü saka alimaji balaka aküm. Iba putu nung alir aika taküm samaogo (*ni Mokokchung nung soa intet anungji iba indang kar zülursem*). Teshinübaji NLTP Act malidanga mim mozü amshir aser achir tulubo liasü. Süra NLTP Act ajanga mozü dangi meyip ta asüba kuli peria lir ma?

Tanabuba nung, "*Arogobo tanela anir aruba mapa dang inyaksüla; Arogo aser politics pei pei teinyaktsü dang inyaksüla*" **Tetezü** yimsüsübaren mesüra lokti yanglushibaren nung shilem magitsüla. Tetasatsüka iba olen ya asen Aor lenirtemi anir tali sashia jembiar angur. Naga lima nung Arogoi alima yangluba nung shilem tulu agia aruba otsü jenti lir masü no! India nung yimmaker kübok tammang tia nung alidanga yimjung mapa Arogo ajanga ang achayanga renem masü na?

Arogo involve masü asübo tawa ang COVID-19 Quarantine Centre Management otsü toa koda? Jala jabasotem India tesem balala nungi arutsü tenzük dang NL Govt. kechi renemer liasü? Arogoi shilem magi ka asübo nübur mulung masüba rara (*civil war*) tenzük lila ta mebilemer no! Mizoram nungbo Election mapang Arogoi shilem tulu agiba ajanga teraksa, ochimashi, mapa tamajung inyaksü nokdangba otsü alima ajongai jembiar masü na? Kechiba NLTPA atema jembiar Arogo tanela indang dang jembitsü ola adoker?

(Maneni asüng adok nung...)

( "*Yakanü adokba iba kasa ocet nung ya 3rd paragraph nung ' Kodang pai (Adam) ... ' ta alibaji Kodang pai ( Noah) ...' ta metongshia züngdaksüner.* )

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**



# Assam nung ozüing tasen ka kübok tang mezing pastor ka puogo

Assam Healing (Prevention of Evil) Practices Bill, 2024.	
<b>A BILL</b>	
Preamble	to bring social awakening in the society and to create healthy, science-based knowledge and safe social environment to protect human health against the evil and sinister practices thriving on ignorance and ill health of people to eradicate the non-scientific healing practices with ulterior motives for exploiting the innocent people and thereby destroying the fiber of the public health of the society for matters connected therewith or incidental thereto.
Short title and commencement	1. (1) This Act may be called the Assam Healing (Prevention of Evil) Practices Act, 2024. (2) It extends to the whole of the State of Assam. (3) It shall be come into force at once.
Definitions	2. In the Act, unless the context otherwise requires - (a) "evil practices" means commission of any act of healing practices and magic healing, by any person, with a sinister motive to exploit common people.
Assam healing practices bill, 2024 indang shidapak ka noksa nung angur.	

**November 27, 2024:** Assam nung 'Magical Healing' anema ozüing tasen ka agizüka benokba sülen tang mezüing iba ozüing kübok Baptist Arogo nung pastor ka puogo.

Arrshi küm 38, pastor, Pranjal Bhuyan ya Dergaon jila nung aliba Golaghat Baptist Arogo nungi lir. Hokolbarnü (November 22) nü pa apuba sülen Honibarnü Golaghat nung Chief Judicial Magistrate matsüngdangi anir ao. Iba sülen pa anogo 14 atema judicial ket nung agütsü.

Pranjal Bhuyan-i 'sayatenya ajanga shirang angeptsüba' maparen benschia Hindu nungertem Khristan yimsü dangi meyipdaksütsü merang, ta ketdangsertemi pa nem tai tongloktsü.

Assam Healing (Prevention of Evil) Practices Act ozüing ya taküm March ita nung state Angh-i agizüka liasü. Iba ozüing tasenba kübok 'temenen inyakyimtemji' sayatenya ajanga shirang aneptsütsü atema benschiba mapatem lir, aser itemji nübur anema inyakba lir, ta ratetja lir.

Police-i Bhuyan anema iba Act kübok Arrla 6(a) aser Bharatiya Nyaya Sanhita nung ajemdaker ken o benok.

Pa aitsüra mezüing aibelenba atema küm ka tashi tepuokdak ayutsü akok, mesüra küm asem tashi atsülangtsü akok, iba denji külemi senchi 50,000 tashi achitsü akok.

Arogo nung pastor, Amit Sangma-i ashiba agi, Bhuyan-i par yimdak (Padmapur) tanurtem tuition class agir. Osang angazükba agi, ita aika tejaklen yimdaklirtem senden ka mena tanurtem tuition classes magidaksütsüla kechiyong Bhuyan-i tuton agiba mapang nung Bible study-a agir, ta bangjema liasü.

Assam Christian Forum (ACF)-i, ketdangsertemi tim masüba nung Arogo züngsem ka puogo, ta aitsü. ACF otongdar, Allen Brooks-i, iba ozüing tasenba ajanga Khristantem anema inyaker aser iba ozüing ajanga yimsü

temeden nokdanger, ta metetdaksü.

Osangbener den jembidang Brooks-i, "Iba ozüing ya ajanga nisung kar temang anema alitsü atema sarasademtsüba züing alema ta züngshir. Tang tatalokba ya yimsü dak sendakba benschiba anema inyakba dang masü saka sarasademba ya ozüing alema inyakba mapa ka kümdaksür. Tesüiba küm 100 dak tali Assam nung Khristantemi shisaliok aser healthcare tsütsü nüburtem tenzüka arur, ajisüaka tanübo sarasademtsü temeden atema-a onoki nokdaksüsa akümer," ta ashi.

Allen Brooks-isa, Khristan yimsü nung 'magic agi aneptsüba' tesayuba mali, ta ashi.

Brooks-isa, Khristan missionary temi mezüing 1840 küm region nung mezüingbuba school amenoka liasü, aser iba mapang nungjagi tenzüka Khristan missionary temi Assam nung shisaliok agütsüba tsütsü tongti shilem agiogo, ta ashi.

"Assam nung onok puti otsü rerangdangang. 1840 küm nungi tenzüka onoki schools aser hospitals amenoka nüburtem tenzüker. Nisung jenti Khristan yimsü dangi meyipdaksütsüji onok nükjidong asübo tanü Khristan nütsüing aika alitsü masü no? Küm 200 jungnüa tejaklen state nung Khristantem liaka tanü-a Khristan nütsüing shilem 4 dang nungi ishiba lir," ta pai ashi.

Ano tanga tatalokba ka nung, taküm September ita tetenzüklen Assam kübok Kokrajhar district nung Mizo nung osangtajung kentener Bethsy Lalrinsangi aser la kinüngbu C. Lalhriatpuia nati kangshia tangartem yimsü meyipdaksü, ta tena nem tai tonglokja liasü.

Apuani na jagi Debitola nung aliba Mount Olive School nung sentong ka ayongzüka liasü, aser iba sentong nungji tenati sarasademtsüba ajanga tanurtem yimsü meyipdaksü, ta tena nem tai tonglokja liasü.

Mezüingbo Kokrajhar

District Court-i tena nem bail agütsütsü memelung saka October 9 nü Guwahati High Court-i tena nem interim bail agütsü. Iba mapang nungji Justice Arun Dev Choudhury-i tena dang anogo ter tsüingda Assam police matsüngdangi oa kuli agüjang, ta tetuyuba agüja liasü.

Chief Minister Himanta Biswa Sarma-i aniba BJP sorkari benokba Assam Healing (Prevention of Evil) Practices Act ozüing ya science dak sendakba knowledge ajungkettsütsü atema lir, iba denji külemi shirangertem madak temenen mapatem inyakba nokdangtsü atema lir, ta parnoki ashir.

ACF nung Tir aser Guwahati nung Archbishop, John Moolachira-i iba ozüing tasenba kübok Khristantemi pei kinüngertem atema sarasademtsüba atema-a aputsüa akok, ta ashi.

Paisa, sarasadem ya ajaki benschiba ka lir, anungji iba ya yimsü meyipdaksüba den memeyokteptsüla, ta ashi.

Nütsüing million 31 aliba Assam nung nütsüing shilem 3.74 dang Khristantem lir.

ACF-i sorkar dang iba ozüing agientsü takhangba agütsüba den külemi yimsü balala amanger senso ajak temeden kümzüksü atema inyakdaksüner, ta mepishiogo.

# ANOGO ABEN TSÜNGREM DEN

## Tsüngremi senzüka meyutsür

"Barley tsük tatak trok ya pai kü nem agütsü, kechiyong pai ashi, ne kinungtsü tetsü dangi ne teka tazüing maotsüla."

Ruth 3:17

Mapang talangka lir Naomi aser lar kibong Moab lima nungi Bethlehem-i meyiba arudang alu roya liasü. Makamait anungji tsükdok shimtsü asoshi Ruth takar alui ao aser lai tsükdok shidena bener aru, aser la kinungbo tetsü tena chiyunga-ajem. Khünü anogo Ruth kidangi meyiba aodang, Boaz-i la kinungbo tetsü dangi teka tazüing maotsü asoshi barley tsük tatak trok ataka bener yok. Iba temoatsü ngua Naomi kanga pela, kechiyong Boaz-i bener yokba tsük ajanga tarutsü anogotem asoshi temoatsü liasü.

Saka Peter-i ashi, "Ni tarabi aser hon maka..., Nazaret nunger Yisu Khrista tenüing nung jangjang..., idangyongsa pa tetsüing aser tenüklangret tashi itda aküm" T.Mapa 3:6-7. Moatsütsü asoshi Tsüngremi Ruth nem Boaz ajurudaksü. Iba ajanga Naomi tepetzük tia nungi jenjang tajungba aküm, Ruth tanaben kibong aküm aser senmanger moatsü. Iba kibong nungi Israel nunger chuba menden nung amentsüsa jakzük. Tsüngremi moatsütsü asoshi asen taküm nem nisung balala ajurudaksütsü, asen dangi arur ajak den sarasadema ajurudi.

### Sarasadem

Yisu nai moatsütsü, aneptsütsü sentong tajung yanglur, kü taküm item ajak nung shilem tajung agitettsü yariangma. Amen

# Ukraine amakba anema jembiba atema Russia nunger pastor ka apu



Rev. Nikolay Romanyuk

**November 27, 2024:** Russia nung pastor kati Temeshi Laishiba nung ajemdaker, Ukraine amakba ya tim masü aser Khristantemiba iba rara nung shilem magitsüla, ta jembiba atema Russia ketdangsertemi pa puogo.

Pa küm 6 tepuokdak ayutsüa akok mesüra Rubles sen million 1 senchi achitsüa akok.

October 18 nü ketdangsertemi Moscow Region kübok Balashikha jila nung aliba Holy Trinity Church nung pastor, Rev. Nikolay Romanyuk apu.

2022 küm September ita nunga sayutsüingdang pastor Romanyuk-i linük security nem temerenshi agütsütsüla, ta yimjak nung jembiba liasü.

Khristan yimsü tangatetba nung ajemdaker pai, Ukraine amakba ya tai ta jembiba oji Russia ketdangsertemi

i o jembitsü memelung, aser tesüsa nikongdang 6:00 ako nung sepaitemi pa puer ao.

October 2 nü Ukraine nunger pastor, Rev. Vladimir Franchuk-i social media ajanga, "Tanü par (Romanyuk) kibong züngsem ajaki timtem tulu ajangshiogo, ajisüaka tanü putu nung Russia nung ki mita aoba aser nisung apuba nungji tesüingmangtsü mali, ajisüaka sasaa bilemer," ta metetdaksü.

"Talisa Pastor Nikolay Romanyuk nem tai tongloktsüba pai Russian Federation-i taochi mesayui Ukraine anema raraba anema jembiba agi lir. Russia nung tamanger-mamanger tai maketba nisung ajak timtemer aser timtemtsü," ta paisa metetdaksü.

Tang pastor Romanyuk ya Moscow nungi kilometer 50 shi pilar aliba Noginsk nung Investigation Prison No. 11 nung puoka lir.

Romanyuk'er adianu, Vasily Romanyuk-a Holy Trinity Pentecostal Church nung pastor inyaka liasü saka 2015 küm süadokogo.

2021 küm Moscow yimti nung ketdangsertemi Holy Trinity Pentecostal Church Tenla ki bendokja liasü aser 2016 küm tesem tasen ka nung Tenla ki tasen süshiogo.

aitsüogo.

2022 küm Romanyuk-i sayutsüingiba video ji livestream asü aser par Arogo indang YouTube channel nunga upload süa liasü. "Iba sayutsüing onük ajanga parnoki pastor ka apu," ta Romanyuk-i metetdaksü.

Holy Trinity Church nungsa pastor, Rev. Roman Zhukov-i anepdang züngia pastor Romanyuk'er ki mita aruba indang osangji October 24 nü lemsatop.

October 18 anepdang 6:20 ako meta sepaitem Romanyuk'er ki tonga aruba sülen mita reprang. Sepaitem jagi Romanyuk'er jabaso ana-Sergey aser Ilya ki kakkoka aitba sülen tenaprong ghonda 12 atem nung rembanga mejangdaksü. Parnoki digital oset balala den kulikaket aika bener ao.

Camera jakedang Romanyuk-



AO OSHI ANGAZÜKDAK:

TANÜ ANGAZÜKTSÜBA OJANG

Tashitsü

(n) tashidak agi timtemdaksüba, angoba (ache, pain)

\* Tebok nung tashitsü atudang kanga timatemer.

Tashitsü

(v) o ka ashitsü aliba ( to tell)

\* Tanü lanurtem dang tashitsü o aika lir.



Tir Yimyim

OLONG PAITEP # 6995

Grid for crossword puzzle #6995 with numbers 1-16.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünüsenbongtsü adokdak - (3)

OLONG PAITEP # 6994 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Sükak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Alima nung tambusang John Alfred Tinniswood arishi küm 112 nung lia süogo. Tinniswood ya Southport care home nung liyonga aru aser November 25, 2024 nü asü. Pa ya August 26, 1912 nü aso aser pai world wars 2 aser British prime ministers 24 kümsük nguogo.

Tinniswood ya 2020 nung UK nung tambutisang aküm aser April 2024 nung Juan Vicente Pérez Mora asüba sülen Guinness Book of Records-i pa nem tambutisang naroküm agüja liasü.

Tripura kaketshirtemi Pushpabanta Palace jakdang lungkak ait



Agartala, November 27, 2024 (Agencies): Tripura sorkari nija ket nung hotel yanglutsü atema Pushpabanta Palace agütsütsü lemtetba anema lisopur kaketshir telok ana den lanur tentetemi lungkak aiter.

Teloktem rongnung Youth Tipra Federation (YTF) aser Twipra Student Federation (TSF) dena lir.

Tipra Motha Party lanur kongsang Youth Tipra Federation (YTF)-i Bodbarnü lungkak aitba sentong ka agi aser West District Magistrate Dr. Vishal Kumar ket nung memorandum ka agütsü.

"Maharaja Birendra Kishore Manikya Bahadur Debbarma-i 1917 küm yangluba Pushpabanta Palace Taj Group ket nung agütsütsü sorkari lemtetba osang angashiogo. Iba atema onoki state sorkar lemtet anema memorandum

ka agütsüogo. Onoki iba ya memulungtsü. Putiotsü dak sendakba tesem kecha business mesüra revenue generation atema magütsütsü" ta YTF president Suraj Debbarma-i ashi.

Tripura nung sobaliba takar anungji Taj Group-i tanga tesem ka nung hotel yanglutsü akok ta pai ashi.

"Hotel yanglutsü atema ali peria dang lir. Parnoki Tripura Tribal Areas Autonomous District Council-i aotsü akok. Iba atema onoki memorandum ka agütsüogo" ta Suraj Debbarma-isa ashi.

"Sorkari Tripura nung sobaliba senmang wazüka meyuteter asü aser kechiba parnoki Taj ket nung agütsür? Sorkari nübertem tsüngdang telangzüba agütsütsüla. Onoki terenlok mesüra Taj Group

anema menokdaker. Onoki pelashishia agizüker saka Tripura nung putiotsü dak sendakba tesemtem mamshitsüla" ta paisa metetdaksü.

North East Students' Organisation (NESO) nung adenba TSF-ia Tripura Tribal Welfare Minister, Bikas Debbarma nem memorandum ka agütsüogo.

"Terenlok aser rongsenketzüng jenjang tajungba akümsüba onoki agizüker saka putiotsü senmang sen yong mamshitsüla. Iba palace ajanga Tripura putiotsü aser sobaliba tamaitü sayur aser iba ya luxury hotel ka melenba ajanga tenüng sensatsür. Sorkari Taj Group ama nija teloktem den sendaktepnüra hotel yanglutsü atema ali balaka agüjang" ta TSF General Secretary Hamalu Jamatia-i ashi.

Meghalaya tourism nung music tulutiba: Paul Lyngdoh

Shillong, November 27, 2024 (Agencies): Meghalaya tourism sector nung tashi tulutibaji music lir ta Tourism Minister Paul Lyngdoh-i ashi.

Meghalaya nung kentenbaren ya unique selling point (USP) tulutiba lir ta pai ashi.

"Meghalaya nung 1950s nungi western music kanga bulua aküm aser iba ajanga nisungtemi state semdangi arur" ta minister Lyngdoh-isa ashi.

Assam semdangi aruba tourist temi Meghalaya semdangir ta paisa ashi.

Meghalaya nung tourism ajungkettsü atema kümshia tourism calendar adoker aser iba nung küm piyong benjung aser sentong balala keta lir, ta Lyngdoh-i metetdaksü.

Northeast ya tourism hub tongtipang ka kümdaktsütsü mangdang nung state sorkari meranga inyaker, ta paisa ashi.

Iba atema Assam Chief Minister Himanta Biswa Sarma-ia Northeast ajunga nung tourism ajungkettsü nungdakba ashi.

Paul Lyngdoh-i ashiba ama Kamakhya temple semdangi aruba tourist temi Meghalaya semdangir ta CM Sarma-isa ashi.

Iba ya sendaktepa lir. Northeast nung sorkar ajaki tourism dak sendakba nung amalitepa inyaker, ta Minister Lyngdoh-i ashi.

Manipur nung MLA tem ki amakba atema tetsür ka apu

Imphal, November 27, 2024 (Agencies): November 16 nü Imphal Valley nung MLA aser minister tem ki amakba dak sendakba nung arishi küm 46 tain tetsür ka puogo.

November 26, 2024 nü Manipur Police-i Thingbaijam Sushila Devi (46 yrs) apu. November 16 nü MLA tem ki amakba nung lai shilem agi, ta

Manipur police-i metetdaksü. Manipur Chief Minister N. Biren Singh-ia minister aser MLA tem ki amakba khukhua aitsüogo.

Tai maketba civilians tepsetba anema timi lungkak aitba pusema nungiter saka democratic movements tenüng amer ozüng alema mapa inyakra aser auyaba aitsür ta CM Biren-i ashi.

"Iba mapa inyaker tem dak sorkari tapet mapa inyaksü. Onoki CCTV footage ajanga ozüng alema inyaksangshirtem jangjaogo. Manipur nung iba ama atalokba atema nüma matanger. Lungkak aitba tenüng nung auyar. Iba ya maaksü lir aser ozüng kübok tapet mapa inyaksü" ta Chief Minister-isa metetdaksü.

GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA

CORRIGENDUM

Dated Kohima the 27th November 2024

No. ED/EST/B-1/2019 : In continuation to this Office Advertisement No. ED/EST/B-1/2019 dated Kohima the 11th November 2024, it is hereby notified for information of all concerned that eligibility criteria No. 7 "minimum driving experience of 5 years" stands removed.

( THAVASEELAN K ) IAS PRINCIPAL DIRECTOR.



# Pakistan police-i Khan pusema longkak aiter tem mintok

**Islamabad, Yimpoksüi/ November 27 (Agencies):** Pakistan indang security forces-i manger mesangwa tsüngda jenjang agiba sülen tepuokdak yua aliba taoba Ato Kilonser Imran Khan pusemterem linük yimtiba Islamabad nungi mintokogo.

Anogo pezü tashi mokdanga ayuba sülen yimti den sendaktepba lenmangtem ketdangsürtem lapoktsüogo, ta Interior Minister Mohsin Naqvi-i Bodhbarnü ashiba den linük yimtiba merektetogo, ta shisem.

Meita aoba sentong benoka inyakba mapang security personnel temi longkak aiter noklang aika apu aser Khan tepuokdak nungi chiokdaksütsü atema khanga longkak aita alir parnok meyirejang aika yimti teyong nungi mintoka liasü.

Bodhbar anepdang yimti merekertemi janatem merektet aser longkak aiter tem linük yimtiba maitdaksüi nokdangtsü atema ketdangsürtemi lenmang nokdanga ayutsü asoshi amshiba shipping container tem agina liasü.

Linük yimtiba longkak aita aotsü atema Khan'er Pakistan Tehreek-e-Insaf (PTI) party-i ayongzüka liasü. Parnoki Khan, shiba ken o 150 dak tema nung

# Ceasefire benokba sülen Lebanon nunger kidangi meyipa odar

**Beirut, Yimpoksüi/ November 27 (Agencies):** Israel aser Hezbollah na tsüngda ceasefire benokba mapa kuma inyaksangshi tenzükba sülen ita 14 tsüngda tang mezüngbuba Lebanon kanga süngjema kümogo. Iba rara nung nisung meyirejang aika tepsetogo.

Bodhbar anepdang 4 ako nungi tenzükba ceasefire benokba sülen southern Lebanon nungi jena aoertem pei kidangi meyipa ao tenzükogo.

Israel military aser Hezbollah na rara anentsü atema tenangzüktepba yangluba ya khen atema dang asütsü asü teti atema asütsü ta aikati bilemer, ajisüaka iba ajanga Lebanon nung nürburtem nem anisüngzüik agütsüogo.

Israel military-i taoba mapang azüngtetsür aliba tesemtemi meyipa maotsü atema tekümdangtsü metetdaksür liaka mangai nisung meyirejang aika southern Lebanon nung pei talidak ki bushia ao tenzükogo.

Nürburtem pei ki bushia ao tenzükba sülen linük yimtiba Beirut aser south na sendaktepba highway nung gari senzüsenpong nung tetsükdaksü adoka liasü.

(Maneni tapak 8 nung...)

aija 2023 küm August ita nungi aliba nungi yimden yimsüsür tepuokdak yua lir, pa akümsang yagi ashiba agi, pa chiokdaksütsü khanga mener taküm election nung shilem longkak aitba sentong ka magidaksütsü atema pa anema ayongzüka agütsü sentong ken o tem ya benoka liasü. yanglua liasü. Cricket asayar (Maneni tapak 8 nung...)

## MULUNGNEN O



ASO : 31.12.1958

ASÜ : 20.11.2024

Asür Merenjamba Imsong, Tatar (Ungma)

Onoki teti dang meima aliba tsürabur asür Merenjamba Imsong, Tatar, pa shirangba mapang nungi tasüba mapang tashi kija, kibong aser lokti balala shirnokisa nübu, rongsen aser tamang sarasadem agi ozü den yaritepa aruogo, nenok ajak dangi tsüngdong arua pelaba melemsatepeter, saka asen Tematiba Tsüngremi nenok ajak moajang ta ozü tamang sarasadem den pelaba lemsateper.

Temeim Kinüngtsü, Chirnur aser Kinüngertem.

## ALI AYOKER

FOOTHILL LEMANG ANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

## AO RIJU SANGDONG

Ref.No. AR/SD/2024/11

Date: 27-11-2024

Ao Riju ajanga maneni Ao oshi nung züluba kaketterem zülumen repringshia azünger (Proof Reader) shimsü asoshi Luchii 17, 2024 nung tatidang agütsü. Iba tatidang AKM Conference Hall nung anepdang 9:00 ako nungi tenzüksü. Tsünglanglen agüja aliba tenüngtem ajak mapang shitak nung arua iba tatidang zülutsü sangdonger. Iba den külemi item kulikakettem bener arutsü shisemer.

1. Educational Qualification Certificate
2. Arangtet tatidang agütsüba kulikaket (Tatidang agütsür alirtem asoshi dang)
3. Mapa inyakba kulikaket.

Sl. No	Tenüng	Yim Tenüng
1	A. Punaluba Longkumer	Changtongya
2	Sungjemtula	Changtongya
3	Pangernungla Tzudir	Molungkimong
4	Aomenla	Longjang
5	Metsungchetba	Mangmetong
6	Asapokla Imsong	Ungma
7	Tzuwazenla Jmr	Ungma
8	Repabenla	Ungma
9	Imsuyangla Imsong	Chuchuyimpang
10	Watila K Jamir	Chuchuyimpang
11	Sensosangla Pongen	Longmisa
12	Limasungla	Mangmetong
13	Sungjemmenla Longkumer	Dibuia
14	Limasenla	Chuchuyimlang
15	Bendangsashi	Mopungchuket
16	Temsuyanger	Longkhum
17	Temsujungla	Waromung
18	Senangmenla Ozukum	Sungratsu
19	Imcharenla Longchar	Chungtia
20	Akumsenla	Longkong
21	T. Watila	Chuchuyimpang
22	A. Chubayanger Longkumer	Changtongya
23	Ngangshipokla	Ungma
24	Tsuknungkala Jamir	Ungma
25	Lipoktoshi	Mongsenyimti
26	Meyimangyang	Mopungchuket
27	Sentinungla	Mokokchung
28	Kajenmenla Jamir	Longmisa

Sd/- Rev. Prof. Rongsen Lkr Chairman

Sd/- S. Wati Ozukum Secretary

# MEDIA FACILITATION CENTRE

**Lounge for Journalists**  
A comfortable space for media professionals to work and relax.

**Live Streaming of Events**  
Don't miss a moment - watch festival events live!

**1 to 10 Dec. 2024**

*Naga Heritage Village, Kisama*

**Computers & Printers**  
Access to essential tools for media coverage.

**Free Wi-Fi**  
Stay connected and upload your stories seamlessly.

**Coffee Machine & Snacks**  
Enjoy refreshments while you work.


**Photo Exhibition**  
Explore a visual journey of Nagaland's heritage.

For inquiries, support, or assistance, please call: +91 96152 47689, +91 76300 05654

[iprnagaland@gmail.com](mailto:iprnagaland@gmail.com)
[Dipr Nagaland](https://www.facebook.com/DiprNagaland)
[diprnagaland](https://www.instagram.com/diprnagaland)
[DIPR Nagaland](https://www.youtube.com/DIPR_Nagaland)



## Bajrang Punia nem küm pezü atema tenokdangba agütsü



**Yimpoksüi/November 27, 2024 (Agencies):** India nung Olympics nung medal ngur aliba wrestler Bajrang Punia, shibai linük indang taoba wrestling association tir anema longka aita liasü, pai doping test agütsü memulungba atema küm pezü asoshi tenokdangba agütsüogo.

Arish küm 30 tain Punia, shibai Tokyo Olympics nung bronze medal ngua liasü, pai March ita national anti-doping agency (NADA) ketdangsürtem nem urine sample agütsütsü memulungba atema asaya nungi anenja liasü.

Punia-i pa nem tenokdangba agütsüba anema nokdakba sülen tenokdangba ya agütsü, saka tang pa nem ano tenokdangba agütsüogo, ta NADA sangdong ka ajanga metetdaksü.

Punia-i, pai kecha nunga aibelena mali ta shia arudar aser ashiba agi, pa sample agütsü atema ketdangsürtemi expire

sür aliba kit bener aruba ajanga pai sample agütsütsü memulungba liasü.

Taoba Wrestling Federation of India tekolakba Brij Bhushan Sharan Singh, shiba Ato Kilonser Narendra Modi-i aniba party nung yimden yimsüstür ka lir, pa anema India nung nungtugu wrestler tem aikati New Delhi nung longkak aita liasü.

Longkak aitba wrestler temi Singh ya mapa nungi agütsü khanga liasü. Pai tetsür wrestler tem dak mekongshitsüyim agi konshiba aser parnok den medemtsü atema takhangba agütsüba anema parnoki longkak aita liasü.

Ajisüaka arishi küm 66 tain Singh-i pa anema benokba ken o tem shitak masü ta ashiba den iba ya pa parliament nungi agütsü atema tasa asaba lir ta ashi.

Kasa mapang nung Punia-i ashiba agi, pa nem tenokdangba agütsüba ya Singh-i pa anema nokdakba atema mang ayangba ka lir.

Iba sülen Punia aser külem longkak aiter aser Olympian Vinesh Phogat na opposition Congress Party nung denogo.

World Anti-Doping Agency-i ashiba agi, 2022 küm tenokdangba agütsür aliba mozü amshirtem India nung timba puteta liasü.

## Mascherano Inter Miami coach kümogo



**Yimpoksüi/November 27, 2024 (Agencies):** Taoba mapang Argentina, Liverpool aser Barcelona midfielder Javier Mascherano, Major League Soccer club Inter Miami indang head coach asütsü shimogo.

Arishi küm 40 tain shiba River Plate aser West Ham nungia asayaogo, pai club den küm asem atema tenangzüktepa yangluogo aser iba tetezü pa 2027 MLS season tatem tashi inyaksü.

Pai, Gerardo Martino melenogo, shibai juli maparen kar aliba ajanga taoba hopta mapa tokja liasü.

Mascherano coach akümba sülen pa maneni taoba mapang Argentina aser Barcelona nung

team-mate Lionel Messi den longjemdaksüogo, shiba 2023 küm July ita Miami nung dena liasü.

“Pa career tepeyong alima nung asayar tajungtiba rongnung ka ama aser tajangshiba peria aliba coach ka ama Javier-i kechiba pa ajunger aji kuli agüja aruogo,” ta Inter Miami co-owner David Beckham-i ashi.

Kasa mapang nung Mascherano-i, “Inter Miami amala club ka anitsü ya ni atema tetushi tulu aser maongka ka lir, koba ni takok tashi tajungtiba nung anitsü merangtsü,” ta ashi.

Argentina nung coach yagi pa asaya aliba mapang asayamung 21 tashi kokogo, kong Barcelona nungi asayaba

## ICC Test bowling rankings: Bumrah temaba jenjangi tuogo

**Yimpoksüi/November 27, 2024 (Agencies):** Australia den Perth nung mezüngbuba Test asayaba mapang ball kanga junga ona team takok dangi aniba sülen India nung pacer Jasprit Bumrah Bodhbarnü sayaba ICC Test bowling rankings nung temaba jenjangi tuogo. Pai Kagiso Rabada aser Josh Hazlewood na ajateta liasü.

Mezüngbuba Test nung India-i Australia run 295 agi akok aser Border-Gavaskar Trophy nung Test pongu asayatsü aliba nung parnok 1-0 agi tejakdang kümogo. Iba asaya nung captain Bumrah-i run 72 agütsür wicket 8 agia liasü.

Perth nung Test masaya tsüngda Bumrah ya tasembuba jenjang nung liasü. Pai tang ranking points 883 ngutetogo aser Australia nung bowler Hazlewood (860 points) aser South Africa nung bowler Rabada (872 points) na ajatetogo.

India nung pacer Mohammed Siraj-ia Australia den asayaba mapang wicket pongu agiba sülen pa jenjang asem tejakdangi tua tang 25buba nung lir.

Mezüngbuba Test asaya tanabuba innings nung run 161 yangluba sülen batter tem rongnung India nung Yashasvi Jaiswal tanabuba jenjangi



tuogo. Pai rating point 825 nguteta lir, koba pa indang career nung tang tashi nung timtiba asütsü. Pa England nung asayar Joe Root (903 points) sülen tanabuba jenjang nung lir.

Career nung Test century 30buba yangluba sülen batsman Virat Kohli jenjang teku tejakdangi tua tang

13buba nung lir.

Kasa mapang nung India nung wicketkeeper batsman Rishabh Pant-ia point 736 nguteta pa trokbuba nung lir.

Australia den Perth nung masayaka India nung asayar Ravindra Jadeja aser Ravichandran Ashwin na Test all-rounders list nung temaba jenjang nung lir.

## BENDANGLI OSANG : Tapak 7 nungi...

### Pakistan police-i Khan pusema longkak...

Khan kinungtsü Bushra Bibi-i anir Mongolbarnü longkak aiter security tem tsükpoka ia Red Zone kümbang tonga oa liasü, kong sorkar ki tongtibangtem aser embassy tem amenoka lir.

Longkak aiter 10,000 dak tema aser security personnel 20,000 shi raratep tenzükba sülen paramilitary sepai pezü densema nisung ishika taküm sama liasü.

Mongolbar aonung army-i Red Zone kübok D-Chowk tesem azüok, kong longkak aitertem adenshir liasü.

PTI-i khen atema longkak aitba sentong anena atatsü telemteba agiba sangdongogo, koba Geo News sangdong ka ajanga Bodhbarnü

metetdaksüogo.

Khyber Pakhtunkhwa province kübok Peshawar yimti indang PTI tir Mohammad Asim-i Reuters news agency dang ashiba agi, ken o kanga junga sensak asemba sülen par party-i tasa tasen asatsü.

Paisa, Bibi aser Khyber Pakhtunkhwa Chief Minister Ali Amin Gandapur na Islamabad nungi kecha lendong majurui meyipa aruogo, ta ashi. Police temi Bibi aputsü bushia liasü.

Hokolbar nü nungi tenzuka police-i Khan pusemer 4,000 dak tema puogo aser iba den linük kübok tesem kar nungbo mobile aser internet service shibangia liasü, ajisüaka tangbo lapoktsüogo.

### Ceasefire benokba sülen Lebanon...

Tzüküm nung aliba yimti Sidon kübok north len yimti-i aiba lenmang gari agi nongbanger tesenzü mejungi akümba osang ajanga metetdaksüogo.

Maneni nüburttem motorcycle aser garitem nung mener tzüküm nung aliba Tyre yimti-i meyipa oa liasü.

Israel military-i item tesemtem kanga mejungi amakba sülen nisung aika meyipa oaka kecha anunga makatsü akok.

Anü adokba mapang linük yimti nung Israel-i ceasefire mebenok tsüngda tesem balala amakba nungi mokozü adokba nguogo.

Mongolbarnü linük yimti nung aser southern suburbs nung alirtem Israel-i military-i tesem balala kanga sashia amakba ajanga inyaksangshi mejungi liasü.

Israel-i Mongolbarnü Lebanon kübok tesem balala amakba sülen nisung 42 tepsetogo, ta local ketdangsürtemi metetdaksü. Hezbollah-ia meyiper Israel dak rocket khaloktsü aser iba ajanga linük north len air raid sirens ola agütsütsüsa aküm.

Taoba küm October ita nungi raratep tenzükba sülen Israel military-i nisung 3,823 tepsetogo aser nisung 15,859 yiruttsüogo.

## BILEMDANGANG

“Tesempatepji temeim agi dang agintettsü.”